

Pcd: Cun trais dunnas e dus umens per il cussegl naziunal

Defender ils mandats da Martin Candinas e Stefan Engler a Berna

■ (anr/gc) Deputà Kevin Brunold, manader da la campagna per la Partida cristiandemocratica (pcd) grischuna quest atun per il parlament federal, ha preschentà venderdi a Cuira ils tschintg candidats e candidatas da la pcd. Per il cussegl naziunal èn quai cuss. naz. Martin Candinas, deputada Carmelia Maissen, mainagestiu Yvonne Brigger-Vogel, deputà Franz Sepp Caluori, la secretaria generala da la pcd svizra Gianna Luzio e per il cussegl dils stans Stefan Engler. La maiortad da quels sin la glista èn dunnas. Quintan ins anc vitiers las quater dunnas sin las duas glistas da la pcd giuvna èsi en tut set dunnas ed otg umens. Deplorablmain n'han ins chattà nagin candidat or dal Grischun talian per sin glista. I na saja betg stà pussaivel da persvader in da là da candidar. La pcd ha ina ferma glista e po era quintar cun bler sustegn tras la pcd giuvna.

Daventar segunda ferma partida

Tenor il president da la pcd grischuna, cuss. dals stans Stefan Engler, vul quella daventar quest onn la segund ferma partida en il Grischun tras augmentar ses electorat da 16,8% sin bun 18% e mantegnair ses mandat cumplain en il cussegl naziunal cun il zunt reconuschì magistrat Martin Candinas.

Sco finamiras principalas programmaticas numna il parsura da la pcd: Segirs plazz da lavur, bieras investiziuns, tuttas valladas duajan profitar dal progress, promoziun da scolaziun e da l'agricultura, in bun service public ed il quità per il clima. Facit: La qualitad da viver da la populaziun duai vegnir rinforzada.

Candidats e candidatas sa preschentan

Cuss. naz. Martin Candinas enumerescha ils accents mess cun sia politica. El vul regiuns da muntogna attractivas, in vast service public, bunas colliaziuns tras vias e viafiers, varietad mediala e linguistica, rinforzar il turissem ed è per ina po-

litica d'energia e clima en favur da l'ambient.

Deputada Carmelia Maissen, presidenta communal dad Ilanz/Glion, s'exprima a pro d'ina politica activa per il clima, ina relaziun partenaria denter la Basa e las muntognas, far diever dal spazi e da las resursas naturalas cun quità e re-

sponsabladad ed è era per in federalissem sco pitga ferma dal stadi per pussibilitar vaira subsidiaridat.

Yvonne Brigger-Vogel, Zezras, è mainagestiu da la Cuminanza d'interess da Grischun Turissem. Cun sia politica contribuescha la pcd grondamain al bainstar general. Sco dunna da fatschenta s'enga-



Candidats e candidatas: Martin Candinas, Carmelia Maissen, Stefan Engler, Yvonne Brigger-Vogel, Franz Sepp Caluori e Gianna Luzio (da san.).

MAD

scha ella per l'egualitad tranter um e dunna e sco mamma per ch'affons n'astgian betg daventar in ristg per paupradad ed è perquai per levgiar la famiglia d'auts custs per sanadad. Turisticamain duai il Grischun vegnir rinforzà e daventar ina regiun attractiva per indigens ed esters.

Deputà Franz Sepp Caluori, Cuira, president da Gastro Grischun, punctuescha la grond'impurtanza dal turissem, la muntada da la famiglia sco basa da nossa societad. Perquai èsi da stgaffir bunas cundiziuns generalas per ella. Era suttastritga el la muntada da meglierar la scolaziun professiunala ed il provediment da la sanadad cun reducir ils custs. El ha già già candidà avant quatter onns per il cussegl naziunal.

La secretaria generala da la pcd svizra, Gianna Luzio, da Savognin a Berna, s'engascha per ina ferma politica federala dal center, in provediment medicinal finanziabel, per ina politica regiunala persistenta e da l'ambient ed in equiliber vers il spert creschament dals centers urbans.

Cuss. dals chantuns Stefan Engler di d'enconuscher – sco anteriur cusseglier guvernativ – bain il Grischun. Ils temas da ses engaschi spezial en: Economia, taglias, taxas, traffic, fatgs da digitalisaziun ed in ferm federalissem e dretg. En il cussegl dals chantuns vegn chattà cumpromiss e schliaziuns en situaziuns difficilas.

Stefan Engler è fitg respectà ed apprezzà en il cussegl dals chantuns. Quai punctuescha cuss. naz. Martin Candinas. Era lez vegn ludà da cuss. dals chantuns Stefan Engler per si'oraifra lavur parlamentara. Cun els dus han la pcd – ed era noss chantun – in ferm team en il parlament federal.